

Meste Laurés,

M'anuncias que bèn lèu anas bandi dins *Lou Campèstre* lis auceloun de vosto gàbi... Zóu! despachas-vous de ié durbi la porto, pèr qu'à noste tour lis ausiguen un pau canta; mai que tóuti lis autre, vous dirai que me languisse d'avé voste libre en man, car sabès, moun gai counfraire, que vau bèn lèu faire parèisse lou diciounàri de nosto lengo, e, dintre vòsti vers acampestri, sabe que troubarai proun terme sóuvagèu que la deletaran. En efèt, brave mète Jan, sias pas fort pèr lou francés, pèr lou latin ni pèr lou grè, mai, coumo disié l'autre, pèr la lengo d'O, digo-ié que vèngon! e vous assure que nous ai jamais tant ris coume quand legiguère voste *Repas de l'ase*.

Que demando lou publi à-n-un qu'escrèu pèr lou publi? Quicon de nòu e de vrai... Eh bèn! vous afourtisse que tout embourri que siegue pèr li libre innoumbrable que siéu tengu de vèire, prene forço mai de goust à legi voste vers rufe que li vers amoussuri de tau e tau pouèto que se crèi mai que vous. Vous, brave mète Jan, à voste biais e à voste dire, se counèis tout d'un tèms que sias fiéu de la terro: avès la pougno duro, l'espressioun vivo e la voues auto, e aquéu que vous entendè dira sèmpre : Vaquí un aucèu de champ!

Vous dise pas mai pèr aro, mai poudès crèire que siéu di vostre, e vous toque la man amistadousamen.

F. Mistral

Maiano, 28 de juliet 1877.